

REGIONAL NEWS

HEADLINES:-

1. Chief Minister Pu Zoramthanga hovin Mizoram PWD hotute leh Joint Action Committee for Plyable Road chuan Lailapur leh Sairang inkar kawng chhia siamthat thuai dan tur an ruahman.
2. Mizoram home department chuan nimin (Inrinni) khan Assam home department hnen atangin ramri buai chungchanga Assam sorkar hnena lehkha an thehluh chhanna a dawng.
3. Israel chuan Lebanon Hezbollah mifirfiakte chu Palestinian Hamas-ten an beihnaa lo inrawlh lo turin a vau.
4. Afghanistan lirnghinga thi chu 2000 chuang an ni tawh.

<><><>

HIGHWAY REPAIR

Nimin tlai khan Chief Minister Pu Zoramthanga hovin Mizoram PWD hotute leh Joint Action Committee for Plyable Road chuan Lailapur leh Sairang inkar kawng chhia siamthat thuai dan tur sawi hovin hmalak dan tur an ruahman.

Nimina Chief Minister hova thukhawm hian Lailapur leh Sairang inkar kawng chhe zual lai thawm that hna tha tak leh chak zawka thawh theih a nih theih na'n leh lirthei lian tlante'n kawngpui siam sa an tih khaihlak loh nan helai inkar kawngah hian Thawhtanni atangin motor lian tlan rih loh ni se, an ti a. Kawng siam that hna thawk nghal tur hian NHIDCL lamin Seling leh Serchhip atangin Truck 30 lung phur chu Pathianni-ah hnathawhna tura rawn dah tan tura tih an ni. He kawng thawmthat hna hi Thawhtanni atangin chak taka thawh tan tum a ni.

Kawngpui thawm that hna hi a chak thei ang bera thawh tum a ni a. Motor lian kal theiha siam a nih veleh motor lian pawh an tlan chhonzawm leh thei ang a. Teirei lei, Darlaka mi leh Bairabi Zamuanga mi thawh mek hi hna chak taka thawk chhonzawm turin PWD-in Contractor-te hriattir ni se. Tuichang leh Kawlkulh inkar kawng NHIDCL-in an enkawl hi siamthat vat a nih theih nan Khawzawl district bawrsapin NHIDCL leh PWD hotute kokhawmin hmalak vat dan tur relpui ni se, tih a ni bawk.

He tih lai hian Mizoram mamawh bungraw phurtu inzawmkhawm, Joint Action Committee (JAC) chuan Mizoram ei leh bar lakluhna kawng chhe lutuk siam that phuta Thawhtanni atangin Sairang leh Vairengte inkarah tlan rih loh an tum tih an sawi. JAC-ah hian Mizoram Truck Owners' Association, Truck Drivers' Association, Mizoram Tippers Driver and Owners Association, Mizoram Oil Tanker Drivers Association leh Kolasib District Drivers Welfare Association te an tel a ni.

<><><>

OIL RATIONING

Mizorama lirthei chi hrang hrang neitu leh khalhtu intelkhawm Joint Action Committee (JAC)-in Thawhtanni atanga tlan loh an tum avangin petrol leh diesel hralh dan khuahkhirh a ni.

Food, Civil Supplies and Consumer Affairs department Director chuan nimin kha hriattirna chhuahin tuialhthei renchem a tul thu a sawi a. Petrol Pump zawng zawng chu a tuialhthei dahkhawl dan dinhmun nitin zinglam dar 9-ah department hriattir tura hrilh an ni a. Petrol litre 5,000 leh diesel litre 7,000 an neih chinah chuan Supply department phalna lovin pekchhuah khap a ni a. A tul angin department-in ruahmanna a siam dawn a ni.

Hetih lai hian JAC-te'n nawrh an huaihawt tur puan a nih atangin Petrol pump hrang hrang a lun hle a. Lirthei tam tak an intlar hlawm a ni.

<><><>

PRESBYTERY

Mizoram Presbyterian Kohhran Presbytery Inkhawmpui hman mek zanina tiak turah eiruk thubuai a thiam loh chantirte thunun ni se tih chu pawm a ni lo.

Aizawl West-II Presbytery inkhawmpui-ah chuan Zonuam Pastor bial atanga thu ngaihtuah tur lut - "Kan kohhran member, hlemhletna (corruption) thila court-in thiam loh a chantir (convict) te chu kan Kohhran dan dinglai anga thunun ni se," tih chu a thehluttu bial hruaitute an thehluh chhan sawifiah turin a sawm a. An sawifiah hnuah Synod Executive Committee (SEC) hnunung berin corruption a thiamloh chantir chu thunun ni se tia hmalak a lo rel tawh avangin sawihona hi tawh mai se an ti ta a ni. Hei bakah hian nikum Synod inkhawmpui a lut, inkhawm tih tlem chungchang chu Presbytery tina ngaihtuah tura vawm let a ni a. Inkhawm tih tlem chungchangah hian tih tlem duh lo Presbytery 28 awmin tih tlem duh zat hi Presbytery 5 an awm bawh a. Thutlukna siam thei lo Presbytery 1 awmin an thutlukna hriat rih loh Presbytery 7 an awm bawh a ni.

Presbytery Inkhawmpui hi Ningani atanga tan a ni a. Hemi ni hian Finance Committee, Upa Thlan Tharte exam, Sub- Pastoral committee leh Nomination Committee te an thukhawm a. Hemi zan inkhawmah hian innlawmna hun leh Pastor Bial Report ngaihthlak a ni a. Zirtawpni khan nilengin Presbytery Rorel inkhawm niin zan hunah hian Vantlang Pathian Biak Inkhawm a awm a. Inrinni nileng khan Presbytery rorel inkhawm niin hemi zan hian Vantlang Pathian Biak Inkhawm a awm leh bawh.

Vawiin Pathianni Chawhma Inkhawmah Upa thlan thar nemngheh Inkhawm buatsaihin chawhnu inkhawmah khan Lalpa Zanriah Sakramen kilho a ni a. Zan inkhawm ah hian Vantlang Pathian Biak Inkhawm buatsaihi a ni anga, inkhawmpui hi a tiak ang.

Tun dinhmunah Mizoram pumah Presbytery 41 a awm mek a. Presbytery Inkhawmpui ah hian Thlarau lam thupui siamin Presbytery Nomination Committee te'n an thlang a ni.

<><><>

BORDER TALKS

Mizoram home department chuan Inrinni khan Assam home department hnen aţangin kumin February thla a ramri buai chungchanga Assam sorkar hnena lehkha an thehluh chhanna a dawng. Home department hotute hnen aţanga thu dawn danin kumin February thla an lekhathawn, Assam sorkarin a ram chhunga awm ni a a hauh khaw 62 chu Mizoram chhung ami a ni e, ti a an hriattirna chhanna chu Assam sorkar atangin Inrinni khan an dawng a. An rawn thawn ni pawh hi October ni 7 niin an ziak a. Chutih lai chuan Assam a chanchinbu lar tak pakhat chuan he lehkha a thu awmte hi Ningani khan a rawn ziak vek tawh thung. Assam sorkar chuan Mizoramin a ram chin ni a a chhal chhunga khaw 62-ah hian Mizo an cheng lo niin a rawn sawi a. Hei hi Assam Border Protection and Development department-in Barak phairuam a district 3 bawrhsapte a hmuna enfiah tura a hriattir anga an enfiah hnu-a an hmuhchhuah report behchhan a nih thu Assam sorkar chuan an tarlang. Mizoram home department official-te erawh chuan he'ng khaw 62 te hi Mizote luah a nih vanga Mizoram chhung ami a ni e, ti a an hauh loh thu an sawi a. Bengal Eastern Frontier Regulations, 1873 tlawhchhana kum 1875-a British sorkar hriattirna a chhuah behchhana Mizoram chhung a ni tih chu an pawm dan a nih thu an sawi.

Tripura Jampui tlangdung leh a chhehvelahte, Cachar hmun thenkhatah te Mizote luah ram zau tak a awm a, chu'ng ram bialte chu Mizoram chhung a ni e, tiin Mizoram sorkarin a hauh lo niin official-te chuan an sawi a. Manipur tlangram a Zofate luah chin pawh sorkar chuan Mizoram chhunga awm angin a hauh lo niin an sawi bawh. He lai a Assam-in a ram chhunga a ngaih khaw 62-te hi Mizoram chhunga awm a nihna chhan chu kum 1875-a British sorkarin British ram chhung Cachar leh Lushai ram an tih (Mizoram) inrina a rin a Lushai ram chhunga a rin luh a ni an ti.

Hetih hunlai hian helai bial hi Inner Line Forest Reserve rama puan a nih avangin mihring an awm ngai lo niin an sawi a. Tuna luahtute hi Assamese an ni lova, Mizo pawh an ni lova, East Pakistan an tih thin Bangladesh aţanga dan kalha lo lut a luah ve ta ngawtte an ni, tiin Mizoram official-te chuan an sawi a ni.

<><><>

AKASHVANI PTC INTERVIEW

Akashvani Aizawl, Regional News Unit-in Aizawl, Saitual, Khawzawl leh Hnahtial-a thawk tur Part Time Correspondent (PTC) a lak tura dilna thehlotte chu naktukah Interview turin Akashvani, Aizawl Station, Tuikhuahtlangah inlan tur a ni.

Interview hi chawhma dar 10-ah tan a ni ang a. Diltute chuan Original Marksheet leh lehkha pawimawh dang, anmahni tichiang theitu ken vek tur a ni.

<><><>

ISRAEL WARNS LEBANON'S HEZBOLLAH MILITANT GROUP AS IT JOINS PALESTINIAN HAMAS ATTACK

Israel chuan Lebanon Hezbollah mifirfiakte chu Palestinian Hamas-ten an beihnaa lo inrawlh lo turin a vau.

Israel leh Hamas inkar boruak tang tak karah Lebanon Hezbollah mifirfiak pawlte chuan vawiin khan Israel lam hmun 3-ah rocket dawrzawn enggemaw zat an kap. Hezbollah rocket kahna hi Syria leh

Israel ramri buai laia Israel lam chan Golan Heights-ah a ni a. Hezbollah pawl chuan hei hi Palestinian an tan vang niin an sawi a ni.

Hei hi Israel sipaite chuan chhangletin Lebanon lam ram an kap ve leh a. Hezbollah chu an innuainaa lo tel ve lo turin an vau zui a ni.

Hemi hma vawiin vek khan Israel Defence Force-te chuan Hamas-in Isreal an beih chhanletna atan 'Operation Swords of Iron' beihpui an lo thlak tawh bawk a ni.

Nimin lama Hamas-in Israel a beihnaah khan mi 300 chuang an thi a, 1,500 chuang an hliam bawk a ni. Hamas chhanletna atana Israel Defence Force-in beihpui an thlaknaah hian military compound 17 an chhu zui a, hei bakah hian Gaza Strip-a Hamas hmun - ral an relna hmunpui (operational command centre) 4 an chhu zui bawk a. Mi 230 chuang an thi a ni.

<><><>

IN AFGHANISTAN, DEATH TOLL FROM STRONG EARTHQUAKES RISES TO 2000

Afghanistan lirnghinga thi chu 2000 chuang an ni tawh tih Taliban thupuangin vawiin khan a sawi.

Tun tuma lirnghing hi kum 20 kalta chhunga lirnghingin Afghanistan a la sawi nasat ber tum a ni a. Tualchhung thuneitute sawi danin mi zawn leh chhanchhuah hna thawh mek zel a nih avangin lirnghinga thi zat hi an la pung chho thei tura ngaih a ni.

Coordination of Humanitarian Affairs chungchanga UN Office sawi danin lirnghingah khan in 465 a chhia a, in dang 135 chu a chim sawp vek a ni.

Afghanistan-ah hian nimin khan khawthlang lam khawpui Herat atanga kilometer 40 vela hlaah magnitutde 6.3 -a nain lir a nghing a ni.

<><><>